

*Naftali Engelbrecht instala como hues*

## Hopi interes pa bira hues of fiscal

**ORANJESTAD —** Durante e instalacion di Naftali Engelbrecht como hues, presidente Evert Jan van der Poel di Corte Comun di Husticia a laga sa cu tin hopi interes pa bira hues of fiscal.

E presidente ta bisa cu ta remarcabel cu na e momentonan aki tin hopi interes pa e estudio pa bira hues of fiscal. “Ariba un anuncio recien di Corte un cantidad sorprendente di mas cu 50 solicitantenan a reacciona. E resultadonan di e procedura di seleccion cu ta andando ta parece prometedor. Pa e aña aki Corte ta pensa di atrae no menos cu tres hues den preparacion. Ta e intencion di Corte cu e añanan binidero lo atrae y guia mas huesnan local potencial. Mi sabi cu Ministerio Publico kier join den esaki pa atrae fiscalnan. Cu esaki nos ta construyendo na e futuro di e Corte aki y di Ministerio Publico kendenan ta bira menos dependiente di ayudo temporal for di Hulanda. Na final ta e intencion pa nos trece e miho candidatonan paden y pa esakinan wordo atrae cu e perspectiva di un curso bon y un funcion interesante y atractivo den hurisdiccion, un pilar importante di comunidad aki.”

Pues e inntencion di Corte ta pa sigui integra Arubianonan



den e grupo di hues y den Ministerio Publico.

### Hues Arubiano

Sr. Van der Poel a habri e encuentro cu un discurso. “Naftali, na nomber di Corte, di curason mi ta yambo bonbini cerca nos i mi ta desea bo hopi satisfaccion y sabiduria den bo funcion nobo.” El a indica cu instalacion di sra. Engelbrecht Corte Superior y Corte den Prome Instancia ta haya un hues di suela Arubiano. “Naci y cria na Aruba, el a caba su estudio na Universidad di Aruba y cu experiencia como hurista na Directie Wetgeving y Juridische Zaken di e pais Aruba. Mas Arubiano no por.”

### Les den Papiamento

Durante su estudio pa bira

hues, sra. Engelbrecht a traha como secretario di corte den Corte. “Supuestamente e no a laga nan spant’e, y el a wordo somete na un seleccion pisa pa e bira hues y cu bon resultado.” Despues di a core tur su stage nan, e ta asina lieu cu el a bira miembro di Corte. “Su bida lo bira diferente? Mi ta spera cu no, pero e chens ta grandi cu e lo mester entrega riba su lunchpauze, ora un tratamiento dura mucho hopi of ora mester pone e ultimo toke na un sentencia. Pa un persona cu sabi con importante ta pa come na ora, esey lo ta un dilema, pero Naftali sa tambe cu trabao ta prome cu yena barica”, sr. Van der Poel a duna di conoce.

Bao di sra. Engelbrecht su guia, huesnan procedente di Hulanda ta hayando les den Papiamento tur siman. “Cu Naftali Corte ta haya un hues colegial, cu sabi su trabao y kende ta involucra cu e organizacion, kende ta tuma tempo y ta haci esfuerso pa educa secretarionan di corte. E sabi di propio experiencia con importante esey ta. Nos lo kier tin mas di su caliber y Corte lo haci esfuerso den e añanan binidero pa sigui cu e Caribisacion”, e presidente di Corte ta laga sa.

Riba potret por mira sra. Engelbrecht durante su hura-mento cerca gobernador di Aruba. □